



Knattspyrnudeild Þórs,  
Sveinn Elías Jónsson formaður,  
Reimar Helgason framkvæmdastjóri.  
*Sent með tölvupósti.*

Reykjavík, 14. apríl 2026

**Efni: Úrskurður vegna skýrslu eftirlitsmanns frá leik Vals gegn Þór þann 12. apríl 2026.**

Á fundi aga- og úrskurðarnefndar KSÍ var tekið fyrir mál Þórs sem er tilkomið vegna skýrslu eftirlitsmanns frá ofangreindum leik. Í samræmi við reglugerð KSÍ um aga- og úrskurðarmál úrskurðar nefndin m.a. um þau atriði sem koma fram í skýrslu eftirlitsmanns. Skýrsla eftirlitsmanns úr leiknum var svohljóðandi:

*Áhorfendur gestaliðs (Þór) voru með handblys - kveikt var fjórum sinnum á handblysum innan um fólk (fjögur handblys í heildina) - Enginn gæsla var sjáanleg sem tók á þessu. EM tóm myndir og sendi inn til staðfestingar, á einhverjum myndum sjást þeir aðilar sem halda á blysunum.*

Þór var veittur kostur á að skila athugasemdum við skýrslu eftirlitsmanns og þann 14. apríl bárust svör frá félaginu þar sem eftirfarandi kom fram:

*„Við þökkum ábendinguna vegna stuðningsmanna okkar á leik Vals gegn Þór þann 12. apríl 2026. Við sáum ekki um skipulagningu og var ekki kunnugt um hvaða áhöld okkar stuðningsmenn myndu notast við til að styðja okkar lið í umræddum leik.*

*Við sjáum ekki um gæslu á útileikjum okkar og getum við því ekki svarað fyrir hvers vegna gæslumenn á vellinum ræddu ekki við okkar stuðningsmannahóp. Við höfum nú, í kjölfar skýrslunnar sem þið senduð okkur, rætt við stuðningsmannahópinn og samkvæmt því samtali var enginn, hvorki vallarstarfsmenn né gæslumenn, sem komu að máli við stuðningsmannahóp okkar og gerðu athugasemd við að þeir væru með blys með sér.*

*Einnig getum við ekki fundið í reglugerðum KSÍ neinar leiðbeiningar eða reglur um hvað stuðningsmannahópar mega bera með sér í stúku og hvað má ekki. Því óskum við einnig eftir því að fá það á hreint frá ykkur og í kjölfarið munum við ræða við okkar hóp. Við höfum þegar rætt við hópinn um að þetta verði ekki endurtekið.*

*Þá er rétt að taka fram, í ljósi þess að í skýrslunni er vísað til gr. 13.9 d-lið að í stuðningsmannahópi Þórs á umræddum leik var enginn af forystumönnum knattspyrnudeildar Þórs.“*

**Niðurstaða:**

Í samræmi við grein 4.2. í reglugerð KSÍ um knattspyrnumót, sbr. einnig grein 5.10 laga KSÍ, skal sérhvert aðildarfélag bera ábyrgð á framkomu leikmanna, forráðamanna, félagsmanna og stuðningsmanna sinna og allra þeirra sem hafa hlutverki að gegna á vegum þess vegna ámælisverðrar eða óásættanlegrar framkomu þessara aðila innan vébanda KSÍ, og getur sætt viðurlögum sem nánar er kveðið á um í lögum og reglugerðum KSÍ. Ber sérhvert aðildarfélag þannig ábyrgð á framkomu stuðningsmanna sinna og getur hlotið viðurlög í samræmi við reglugerð KSÍ um aga- og úrskurðarmál og/eða lög KSÍ.

Á fundi aga- og úrskurðarnefndar 24. júní sl. lá fyrir greinargerð frá knattspyrnudeild Þórs Að teknu tilliti til greinargerðarinnar og annarra fyrirliggjandi gagna er það álit aga- og úrskurðarnefndar að framkoma áhorfenda Þórs, er kveikt var á blysum í áhorfendastúku, hafi verið vítaverð og hættuleg. Samkvæmt framangreindu fellur framkoma áhorfenda undir d-lið gr. 13.9 reglugerðar KSÍ um aga- og úrskurðarmál. Ákvæðið er svohljóðandi:


*„Ef forystumaður aðildarfélags, sem ekki er á leikskýrslu eða áhorfandi gerast sekir um vítaverða eða hættulega framkomu gagnvart leikmönnum, dómurum, þjálfurum eða öðrum er heimilt að sekta viðkomandi aðildarfélag um allt að kr. 500.000. Ef brot telst alvarlegt eða um ítrekun er að ræða er auk þess heimilt að setja viðkomandi lið í heimaleikjabann, þar til öryggi leikmanna, þjálfara og annarra telst tryggt.“*

Með vísan til framangreinds ákvað aga- og úrskurðarnefnd KSÍ að sekta knattspyrnudeild Þórs vegna blysa sem kveikt var á í fjórgang. Sektir skv. d-lið gr. 13.9 nema að hámarki sekt kr. 500.000,- og telur aga- og úrskurðarnefnd hæfilegt að sekta Þór um kr. 250.000,- og er þá tekið tillit til fjölda blysa.

**Úrskurðarorð:**

Knattspyrnudeild Þórs skal greiða sekt að fjárhæð kr. 250.000,- til KSÍ.

Virðingarfyllst,  
f.h. aga- og úrskurðarnefnd KSÍ,



Axel Kári Vignisson  
lögmaður/yfirlögfræðingur KSÍ